



## TALOFA LAVA!

E mua lava le viiga, o le faafetai ma le faamanū i le Atua, i lona alofa ma lona agalelei, tapuaaoina ai i le manuia le soifua o le mamalu o le Ekalesia Aoa, ua potopoto i Malua mo lana Fono Tele o lenei tausaga, 2024.

Ou te faatalofa atu i le paia o le Ekalesia i ona tulaga faa-lupe. Afio lau Afioiga i le Taitaifono ma le Faletua, faapea le Laulau-a-fono o le Fonotele. Afio le Laulau-a-fono o le Komiti o Tamā o le Ekalesia. Susū Toeaina Faatonu ma Faletua; Susuga i Toeaina ma Faletua; Le nofo-a-Komiti o le Ekalesia; Susuga i Faafegaiga ma Faletua, ma le mamalu o usugafono uma o le Ekalesia.

I le ava tele e tuina atu ai nai tala otooto o le folauga faa-le-aoaoga a Malua i lenei vaiitaimi o le tausaga.

O le Aso Lulu, aso 7 o Fepuari, 2024, na amata aloaia ai le tausaga faa-le-aoaoga a le Kolisi mo lenei tausaga. E pei o tu ma aga masani a le Kolisi, na amata i le Sauniga Lotu ma le Faamanatuga i le itula e 7pm i le afiafi, na ta'ita'iina e le Afioiga i le Taitaifono o le Komiti o Malua, Susuga i le Toeaina ia Asotasi Gu Time. Na faafofia ai ma A'oa'o ma Faletua o le Tausaga Muamua i lea sauniga, ma Susuga i Faiaoga ua a'e manuia le taumafai mai a'oa'oga sa feagai ai, ma ua faaopoopo mai e tauave faatasi le galuega faafiaoga o lenei tausaga.

O le aso 11 Ianuari 2024, na afea ai Malua i le faanoanoa ma le loimata maligi, ina ua faamanavaina e le Atua galuega a le Faletua o Josephine Malutafa ona o se gasegase. O le aso 20 Ianuari na



Susuga Rev. Prof. Vaitusi Nofoaiga Pule o le Kolisi

faia ai ona toe sauniga i le Iupeli i Malua, ma taoto ai i lona oliolisaga tumau i Nuu Fou Faleata. Ou te avea lenei avanoa, e faaleo ai le agaga faafetai tele i le Faletua ia Josephine Malutafa ona o lana tautua ma lana auunaga i le Ekalesia e ala i le Kolisi Faafifeau i Malua. Ia alofagia pea e le Atua, le Susuga i le Faifeau Faiaoga Foma'i ia Malutafa ma le nofoaalo.

E 16 le aofa'i o faiaoga o loo iai i le taimi nei e aofia ai le Pule ma le Sui Pule. E to'alima faiaoga ua faaopoopo mai i le galuega i lenei tausaga. O le Susuga i le Faifeau Foma'i Faiaoga ia Reupena Maulolo ma le Faletua ia Rosa; Susuga ia Karanita Petaia ma le Faletua ia Elena; ma Susuga i Faiaoga fou ia Tafatolu Tapaleao ma le Faletua ia Aaone, Faafetai Korina ma le Faletua ia Jeddah,

ma Hobert Sasa ma le Faletua ia Pepe. Ua faaopoopo nei i polokalame o tapuaiga ma faigalotu a Malua ia le Lotu Au Leoleo, e faia i Aso Lulu i le 5.00am i le taeao – e taitaiina e le Pule ma Faiaoga. Ua faaopoopo foi i le matou mataupu o le Aganuu i le Aso Faraile ia le a'oia o le musika, mo A'oa'o.

O loo faaauu le faatinoina pea e Faiaoga Malua o le tusiaina o tusitusiga faa-va-omalalo, e pei ona tatalaina aloaia ai, nisi o tusitusiga, e pei o: *Unsettling Theologies; Catch the Bird and Watch the Wave* ma le *Su'esu'ega o le Tusi o Fa'aaliga*. O nisi nei o tusitusiga ua maea lolomiina i lenei tausaga, 2024. Na maua le avanoa e tatala aloaia ai ma faailoa nei tusitusiga, i luma o le Fono Tele o lenei tausaga, 2024.

E momoli le agaga faafetai tele i le tapuaiga ma le tatalo a le mamalu o le Ekalesia Faapotopotoga Kerisiano Samoa, i Samoa nei ma atunuu i fafo: Lau Afioiga i le Taitaifono ma le Laulau-a-fono; Le mamalu o Tamā o le Ekalesia, o Komiti eseese, o Matagaluega, o Pulega, ma Aulotu.

Ia manuia tele le fono usu a le Ekalesia i lenei tausaga.

Vaitusi Nofoaiga

**PULE KOLISI MALUA**

### SILASILA I TOTONU

Talofa Lava! - Susuga Vaitusi Nofoaiga	1	International Conferences	11
Tautai A'e - Faifeau Penisione	2	Polokalame Aso Maluu/ Aso Sa o Tina	12
Sauniga Aloa'ia - Tofi Porofesa	3	Mafutaga A'oa'o ma Faletua	13
Sa'afiafiga - Josephine Malutafa Faalili	4	Fale Tusi fou mo le Kolisi/ Motu le Pa	14-15
Amata Galuega/ SQA Accreditation	6	Faamasani Tausaga 3 i Niu Sila 2025	16
Malua Bible School/ Master Programme	7	Vaega Eseese i le Kolisi	17-19
Faalauliloa a le Kolisi i Ana Tusiga	8-10	Malua Golf	20

## TAUTAI A'E - FAIFEAU PENISIONE

O se tasi o vaega tupito o le Fono Tele i tausaga taitasi, o le sauniga faapitoa e aloa'ia ai le malolo penisione o Susuga i Toeaina ma Faifeau ma Faletua mai le galuega tausī nuu. O le Aso Lulu, 22 o Me na faataunuuna ai lea sauniga taua, e faailoa ai le agaga faafetai a'e o le Ekalesia Aoao mo nisi o Tamā ma Tinā ua a'e i fanua le faatamasoaliiga. O lea sauniga faapitoa na taitaia lava e le Afioga i le Taitaifono o le laulau o le Fono Tele, le Susuga i le Faafeagaiga ia Esera Auatama Esera. Sa faamamafa ai e le Taitai o le sauniga le "fa'ase'etuāgalu" ai o auauna a le Atua, ae o loo fa'aauau pea ona galulue i le galuega a le Atua, e ala i lo latou fautua, ma le lagolago. O le Susuga i le Sui Taitaifono, Susuga i le Toeaina Faatonu ia Tunumoso Iosia sa saunoa e momoli talosaga i le sauniga. Ua se togi le seu na laga tila ua faapulou le tualima, ua faamalo fai o le faiva, aua o lea lava sa outou utuutu le salefu aua le utugavai faaleagaga aua le Ekalesia a le Atua. Ia manuia tele le feagai ai ma malologa i le alofa ma le agalelei o le Atua.

### Lisi o Toeaina ma Faifeau Penisione



Faatulituli & Meripa Setu FT  
Mtg Laumua o Aotearoa



Vaelua Patu FT  
Mtg Manukau



Fiatepa & Penina Faace FT  
Mtg Aukilani



Vaigalo & Petimara Maua FT  
Mtg Apia Sasa'e



Oliva Tia'i FS  
Mtg Laumua o Aotearoa



Sisigafu'a & Paratisa Bentley FS  
Mtg Hawaii



Viliamu & Kathryn Chan Fong FS  
Mtg Niu Sila i Sautē



Pepa & Ailini Taavao FS  
Mtg Niu Sauselese Sisifo



Iakina & Rowina Alefaio FS  
Mtg Falealili-Safata-Siumu



Lauama & Elieta Fonotaga FS  
Mtg Aana



Susuga & Faasalua Alefaio FS  
Mtg Lotofaga-Lepa-Aleipata

## FAIFEAU FAAU'U

E maualuga pea le viiga ma le faaneetaga i le Atua. O ia lava na te valaauina ma tofofi le au faigaluega mo lana feau o le faaolataga mo tagata uma. O le lagona maualuga lea na faaosofia ai le paia o aiga, uo, aulotu, ma nuu, ina ua faataunuuna ma le manuia le sauniga o le faauuga o Faifeau Samoa i le Fono usu a lana Ekalesia, 2024. I le mae'a ai o le lua tausaga o galulue mo lana Ekalesia, ua mafai nei ona ave'a i latou nei ma Faifeau Samoa (FS) e faatinoina sakalameta taua a lana Ekalesia paia e aofia ai le sauniga o le Faamanatuga ma le sauniga o le Papatisoga.

### O suafa nei o i latou ua faauuina i leni Fono Tele.

Rev Atapana ma Victorie Lau,  
Rev Emani ma Naitosara Tevaga,  
Rev Fa'afetai ma Tamara Nepo,  
Rev Fa'asaoina ma Pologa Komiti,  
Rev Falepau ma Caroline Agina Tuiluga,  
Rev Isaako Junior ma Alice Iose,  
Rev Kapeni ma Renolla Matatia,  
Rev Kereveta Liko ma Fa'anaiaua Tiumalu,  
Rev Ketty ma Vetta Iupeli,  
Rev Konelio ma Ioka Taumaloto,  
Rev Lancelotte ma Naomi Alaimoana,  
Rev Loia Elisaia ma Easterakesa Kolia,

Rev Matalevai ma Pekina Laufiso,  
Rev Navy ma Amiaifolau Luatua,  
Rev Niutuiautua ma Cecilia Onesemo,  
Rev Penehuro ma Feagia'i Lilomaiava,  
Rev Peniamina Peleti ma Felicia Toailoa,  
Rev Penitala ma Reima Kolose,  
Rev Petaia Aimaau Geoffrey ma Daphne Petaia,  
Rev Senetenari ma Leono Autagavaia,  
Rev Silipa ma Tagiilima Silipa,  
Rev Talamitaki ma Vaitui Hasini,  
Rev Tavita Simi ma Logosuau Reupena,  
Rev Vauea ma Susie Esau,  
Rev Visesio ma Fa'apenu Leilua

Ia manūteleina le soifua valaauina i le feau ma le galuega a le Atua.

**SAUNIGA ALOA'IA FAAEEINA O LE TOFI POROFESA O LE FEAGAIGA FOU PULE KOLISI FAAFAIFEAU I MALUA, VAITUSI NOFOAIGA FS.**



O le agaga faagaetia i le Atua, ona o Lona alofa ma Lona agalelei ua a'e manuia ai le faatamasoaliiga, e ala i le faaeeina o le tofi Porofesa o le Feagaiga Fou i le Susuga i le Alii Pule, Rev Prof. Vaitusi Nofoaiga. O lenei matati'a sa mafai ona ausia e le Susuga i le Alii Porofesa, ina ua mae'a ona iloilo ina aiaiga faatulagaina, ina ia o gatasi foi ma ta'iala faatulagaina a le Kolisi, lea sa faamaonia e Susuga i Alii Porofesa sa fai ma external reviewers, le Susuga ia Rev Prof. Paul Trebilco mai Otago University, ma le Susuga ia Prof. Malama Meleisea mai le Iunivesite Aoa o Samoa. O nisi o tulaga na mafai ona ausia e le Susuga i le Faifeau Porofesa ia Nofoaiga, o ana tusitusiga e ala i ana tusi e lua, o book chapters ma journal articles, o le sili atu ma le 10 tausaga o galue faafiaoga i totonu o le Kolisi talu ona mae'a lana faafomai, o lana auunaga i totonu o le Ekalesia i nisi o tofiga ma Komiti, ma le tele o isi galuega sa ia faatinoina e ala i le tofi Pule e pei ona ia tauaveina i le taimi nei. O le Aso Tofi, 23 Me 2024 sa faia ai le sauniga aloa'ia, e faaee ai le faailoga Porofesa i le Susuga i le Alii Pule. Sa taitaina lenei

Sauniga e le Susuga i le Taitaifono o le Komiti o Malua, le Susuga i le Toeaina Faatonu ia Asotasi Gu Time. O talosaga na saunia lea e le Susuga i le Taitaifono o le Ekalesia Aoa, le Susuga i le Faafeagaiga ia Esera Auatama Esera, ma le lauga na saunia lava e le Taitai o le Sauniga. O saunoaga faapitoa na faia i lea sauniga, o le saunoaga muamua na faia lea e le Susuga i le Faifeau Porofesa ia Paul Trebilco. i lana saunoaga, na ia faailoa ai se ootoga o lana faaiuga i le taliaina lea o le avea o le Susuga ia Nofoaiga e fai ma Porofesa o le Feagaiga Fou. A o le saunoaga lona lua na faia e se tasi foi o Tamā na tauaveina le tofi Pule o le Kolisi i le tele o tausaga, le Susuga i le Faifeau Penisione Porofesa ia Otele Perelini. I lana saunoaga, na ia ta'ua ai le taua o polokalame aoaoina i Malua ma le faamoemoe o le faaeeina o le tofi Porofesa i le Susuga ia Nofoaiga. Ina ua mae'a le sauniga, sa faia le taumafataga i le Fale Senetenari mo le Au Faigaluega ma le au valaaulia. E viia lava le Atua ona o le faaogaina o le soifua o le Susuga i le Alii Pule auā Ana feau ma Lana Talalelei. Tautai A'e, lau Susuga i le Alii Pule, lau Susuga i le Faifeau Porofesa, Vaitusi Nofoaiga FS.



**FAAUUGA - REUPENA MAULOLO**



O le Aso Lulu, 13 Tesema, 2023 sa faauuina ai le Susuga i le Faifeau Faiaoga ia Reupena Maulolo i le faailoga o le Doctor of Philosophy mai le University o Otago i Niu Sila, ina ua faaiuina ma le manuia lona taumafai. Sa amataina le taumafai i le Aso 1 Mati, 2020 ae faaiuina i le Aso 28 Iulai, 2023. O supervisors sa feagai ma lenei faamoemoe o Professor Murray Rae ma Rev Dr Kevin Ward. O le auau poo le faatautu o le tusiga ma le suesuega e faaulutalaina faapea: **Toe Matimati le Ūpega: A Practical and Theological Reflection on the Significance of Expository Preaching for the Faith and Spiritual Life of Young Samoan Christians.**



O loo galue nei le susuga ia Maulolo i le Matagaluega o le Alofilima o le Mataupu Silisili i le Kolisi Faafaifeau. E faaleoina ai le loto faafetai o le Faiaoga i le Alii Pule ma le Kolisi i Malua, tainane le tapuaiga a Tamā o le Ekalesia ma le Ekalesia Aoa, a o Ekalesia uma foi i Samoa ma Niu Sila sa fesoasoani malosi i lona taumafai.

Ia faamanuia le Atua.



## SA'AFIAFIGA - JOSEPHINE MALUTAFa FAALILI



**Josephine Malutafa Faalili**  
6 Iulai 1978 - 11 Ianuari 2024

Auē ua to le timu, ua tafea le tau'ofe, ua masaesae le lagi! Talofa ua gau olosa'a ae tafea pulu i vai, ina ua fai i lagi le folauga a le Afioga i le Faletua o le Faifeau Faiaoga Fomai, o Josephine Malutafa Faalili. Na ulufale mai le Faletua ia Josephine i le Kolisi i Malua ma le Susuga ia Faalili, i le tausaga 2004, ma faaiuina lo la taumafai i le tausaga 2007. Sa faaauauina lo la taumafai i le Kolisi Faafaifeau a le Pasefika i Fiti (Pacific Theological College) mai le 2008-2009, ma toe foi mai ai i Malua e avea ma faiaoga i le tausaga 2010. O le tausaga 2015 na malaga ai i Ausetalia mo le



sailiga o le Fomai a le Susuga ia Malutafa, ma faauiuina ai i le tausaga 2019, ma toe faaauauina ai le soifua galue i le galuega faiaoga e oo mai i le taimi nei. Ae peitai, na faamanavaina e le Atua galuega a le Faletua ia Josephine, i le aso 11 Ianuari 2024, i le Maota Gasegase i Motootua. Sa faia le Sauniga Faaleaiga i le Aso Tofi, 18 Ianuari 2024. O ona toe sauniga na faia i le Aso Toonai, 20 Ianuari 2024, sa faia lea i le Fale Iupeli i Malua, na taitai ai le Susuga i le Alii Pule ia Rev Prof. Vaitusi Nofoaiga. Sa momoli mai e le Susuga ia Rev Dr. Brian Kolia lona tino maliu i totonu o le Falesa. O talosaga na saunia e le Susuga i le Sui Pule ia Rev Dr. Arthur Wulf, a o le Susuga ia Rev Dr. Samasoni Moleli na saunia le upu faamafanafana mo le Susuga i le Fomai Faiaoga ia Malutafa ma le nofoaalo, ma le paia o aiga. I le maea ai o le sauniga, na molimoli atu ai lona tino maliu i lona oliolisaga tumau i Nuu, Faleata. Aue! Ua maliliu toa, ua maumau ai auupega o le taua! Manuia lau malaga, Josephine Malutafa Faalili.

## FEILOAIGA MA PAUL TREBILCO



O le susu mai o le Alii Porofesa o le Feagaiga Fou o Paul Trebilco mai le University of Otago i Niu Sila a'o feagai le Ekalesia Aoa ma lana Fono Tele o lenei tausaga 2024, ina ia faaecina aloaia le faalagiga o le Porofesa i le Susuga i le Alii Pule o le Kolisi Faafaifeau i Malua, le Susuga i le Faifeau Porofesa ia Vaitusi Nofoaiga. Sa maua foi ma le avanoa o Faiaoga ma A'oa'o o le polokalame o le Masters, ma le tausaga fa, lua ma le tolu o le polokalame o le Bachelor of Divinity e faasoa ai ma le Alii Porofesa mai Niu Sila. O se moemitiga sa faavaeina i le finagalo o Tama o le Ekalesia ma ua aloaia ai nei ona faasuaafaina le Alii Pule o Malua: Rev Professor Vaitusi Nofoaiga. Avea ai lenei laolao e faaleoina ai le faafetai ma le faamalō i le susuga ia Rev Professor Vaitusi Nofoaiga i le faaeaea i aiga, nuu, le atunuu, faapea le Ekalesia.



## FAIAOGA FOU

O le faaiuga o le tausaga 2023, na faauuina ai mo le uluai taimi i latou ua filifilia e avea ma Faiaoga o le Kolisi Faafaifeau i le faailoga taualoga o le Master of Theology i lana polokalame na amataina i le tausaga 2022. O le Susuga ia Tafatolu Tapaleao ma le Faletua ia Aaone mo le Matagaluega o le Mataupu Silisili, o le Susuga ia Hobert Sasa ma le Faletua ia Pepe mo le Matagaluega foi o le Mataupu Silisili, faapea le Susuga ia Faafetai Kororia ma le Faletua ia Jeda i le Matagaluega o le Faiva Alofilima o le Mataupu Silisili. O le amataga o le tausaga lenei 2024, na amata aloaia ai loa i latou nei i le tofi faa-Faiaoga mo le Kolisi i Malua. Ia alofagia e le Atua le feagai ai ma tofiga i totonu o le Kolisi Faafaifeau a le Ekalesia.



## FAIAOGA TOE TALIU MAI & A'OA'O SIKOLASIPI

### FAIAOGA TOE TALIU MAI



O le tausaga nei na toe taliu mai ai i le Kolisi le Susuga i le Faifeau Faiaoga ia Karanita Petaia, le Faletua ia Elena ma le fanau. O le Susuga ia Karanita sa auai atu i le University of Divinity i Melepone Ausetalia, aua le faailoga o le Fomai o le Tofa Manino (PhD).

### A'OA'O SIKOLASIPI



E to'atolu A'oa'o sikolasipi a le Ekalesia i lenei tausaga o loo i le polokalame o le Master of Theology. O le Susuga ia Fraser Tauaivale ma le Susuga ia Saleaula Reti o loo faamoemoe e faau'u i le tausaga nei, a o le Susuga ia Mateilili Tautalagia i le tausaga fou. O loo alala lava Susuga i A'oa'o sikolasipi ma o latou Faletua ma fanau i totonu o le Kolisi.



## AMATA GALUEGA MALUA 2024

O le Aso Lulu, 7 Fepuari, 2024, sa toe amatalia ai galuega a le Kolisi mo lenei tausaga, ina ua a'e mai le faiga malologa ma se sailiga malosi a le Susuga i le Alii Pule ma le Faletua, le Sui Pule ma le Faletua, Faiaoga ma Faletua, faapea A'oa'o ma o latou Faletua o le tausaga lua, tolu ma le fa. O se vaaiga fiafia foi i le taupati mai o A'oa'o o le tausaga muamua ma o latou Faletua ma fanau, a o le tapuaiga foi i Toeaina, Faafeagaiga, matua ma aiga. O le afiafi o lea lava aso sa faia ai le sauniga lotu ma le faamanatuga e Tamā o le Kolisi e tatala aloāia ai galuega o lenei tausaga. Sa taitaia lea sauniga e le Taitaifono o le Komiti a Toeaina, le Toeaina Faatonu ia Asotasi Gu Time, ma le lagolagosua a Toeaina Faatonu ia Leaso Tupai, Pouniu Faamausili faapea Tauaana Mataafa. Ma latou faamanuia mai ai i le Alii Pule, Faiaoga ma le Kolisi i ana galuega. Sa faaiuina lea afiafi i se taumafataga faapea nai meaalofo mo Toeaina, Faafeagaiga ma nisi o Tama Penisione. Faafetai mo faamanuiaga ma le tapuaiga.

## SQA ACCREDITATION

### ILOILOINA LE FAAILOGA MAUALUGA O LE MASTER OF THEOLOGY

O le aso 29 ma le 30 o Aperila, 2024, sa faatinoina ai e le Pulega o Faailoga ma Tusi Pasi Taualoa a Samoa (*Samoa Qualification Authority*) le uluai iloiloiga mo le polokalame o le Master of Theology a le Kolisi. E to'afa (4) sui auai sa filifilia e le SQA mo lenei faamoemoe tāua, o le Susuga i le Faifeau Fomai Faiaoga ia Olataga Elu mai le Kolisi FaaFaifeau i Piula, ma le Afioga ia Patele Pesamino Victor, le Pule o le Telosia Moamoa. O isi sui e to'alu mai atunuu mamao e aofia ai le Alii Porōfesa ia Paul Trebilco mai le Univesite o Otago, NZ (sa auai mai le zoom), ma le taitai malaga i le Alii Fomai ia Stephen Currow, o le Kolisi mo Aoaoga Mauuluga i Newbold, mai Peretania Tele. O le Pule Lagolago o le SQA, le Faletua ia Asiafau M. Lino-Mariner sa fai ma sui o le Pulega mo lea faamoemoe.

O leni iloiloiga sa faatautaia ai faatalatalanoaga (*interviews*) eseese ma le Susuga i le Alii Pule ma le Sui Pule; Faauluuluga o Matagaluega ma Faiaoga; Sooupu o polokalame eseese ma Faiaoga mo vasega faapitoa, aemaise foi i Faafeagaiga, Faifeau ma A'oa'o o loo a'oa'oina i leni polokalame. Sa latou faatalatalanoa ai nisi itutino tāua o le Kolisi, e pei o i latou o lo'o galulue i le Fale Tusi, ma nisi o le "Administration Staff". Sa faapea foi ona auai mai ai Taitai o le Ekalesia, le Afioga i le Taitaifono o le Fono Tele, le Susuga i le Faafeagaiga ia Esera A. Esera, le Afioga i le Sui Taitaifono, le Toeaina Faatonu ia Tumumoso Iosia ma le Teutupe Aoa o le Ekalesia, le Susuga i le Faifeau ia Melepone Isara, faapea foi sui o Tamā o le Kolisi (Komiti Faatonu), le Taitaifono, le Toeaina Faatonu ia Asotasi Time ma le Failautusi, le Toeaina Faatonu ia Amuia Seuala. Sa latou asia foi potu aoga ma ofisa o Faiaoga auā e taua uma i le iloiloiga.

Ina ua faaiu leni faamoemoe, sa faailoa mai ai e le taitai malaga le mauuluga o le tulaga o loo faatino ai leni polokalame, ma ia faailo ai le tulaga manuia o le faamoemoe, a o talia le latou tali tusitusia e faamaonia ai le pasia lelei o leni polokalame. Sa ia saunoa foi o le Master of Theology a Malua o le a avea ma fua taiala (benchmark) mo polokalame uma o le Master of Theology i Samoa ma le Pasefika. Ia viia le Atua ona o leni faamoemoe ua taunnu ma le manuia.



## TUSI MO LE SUEGA ULUFALE 2024

**FEAGAIGA TUAI: Hosea**  
**FEAGAIGA FOU: 1 & 2 Korinito**

## MALUA BIBLE SCHOOL



**MALUA BIBLE SCHOOL**  
Orientation & Registration 2024  
<https://malua.edu.ws/malua-bible-school/>

**SIGNS OF THESE TIMES**

**A Free Public Lecture for All**

**Biblical and Theological themes include:**

- Law & Justice
- The End of the World
- History of the Church & Government
- Theological interpretation of Transformation
- Healing & Recovery

**EFKS TUPULAGA HALL, SOGI**  
**FRIDAY 02 FEB 2024, 5.30PM-8.30PM**  
**[REPEATED SATURDAY 03 FEB 2024, 10AM-1PM]**

**SCAN ME**

O le Aso Faraile ma le Aso Toonai, 02-03 Fepuari tausaga nei, sa faia ai se faatalanoaga faalauiloa (public lecture) a le Pule ma Faiaoga o le Aoga Tusi Paia a Malua, e amatalia ai galuega o lenei tausaga. O lea faatasiga sa folasia ai pepa ma tusitusiga a Faiaoga mai Matagaluega eseese o le Aoga Tusi Paia (Feagaiga Tuai, Feagaiga Fou, Mataupu Silisili, Tala Faasolopito o le Lotu, Faiva Alofilima o le Mataupu Silisili) agai mataupu eseese o loo fia malamalama ai le toatele



**AOGA TUSI PAIA A MALUA**  
FAALAUILOA & RESITALA 2024  
<https://malua.edu.ws/malua-bible-school/>

**O SE FAATALANOAGA O FAAALIGA MO TAIMI NEI**

**O NI A'OA'OGA MAI LE TUSI PAIA MO SOO SEISI AGAI MATAUPU NEI:**

- Tulafono ma Faamasinoga
- O le i'uga o le lalolagi
- Talafaasolopito o le Lotu ma le Mälö
- Mataupu Silisili o Suiga
- Faamalologa ma le Ola Toefuataina

**MAOTA TUPULAGA EFKS, SOGI**  
**ASO FARAILE 02 FEPUARI 2024, 5.30-8.30 (AFIAFI) [TOE FAIA, ASO TOONAI 03 FEPUARI 2024 10.00 (TAEAO) - 1.00 (AOAULI)]**

**SCAN ME**

i nei aso. O ni motugaafa ma mafaufauga sa faatalanoa ai mataupu nei: (i) o Tulafono ma le Faamasinoga i le Tusi Paia ma Aso nei; (ii) o le I'uga o le Lalolagi ma le Tusi o Faaaliga; (iii) o le Talafaasolopito, o le Galuega a le Lotu ma le Malo i Samoa; (iv) o le faatalanoaga o le Mataupu Silisili o Suiga; ma lona (v), o le Galuega Faamalolo ma le Ola Toefuataina. E toatele lava latou sa auai atu i lea faamoemoe e pei ona faatinoina i le Maota o Tupulaga a le EFKS i Mulinuu, ma sa matagofie lava fesili ma le faatalanoaga sa faasoa i aso e lua o le faatalanoaga faalauiloa. O se avanoa foi sa faatino ai resitala mo vasega o le Kuata muamua o lenei tausaga.

Sa mātauina le faatoateleina o le au aoga o le Aoga Tusi Paia i Apia lenei Kuata muamua o le tausaga mai le Kuata mulimuli o le tausaga na se'i mavae atu nei, ma e faapea foi se vaaiga mo le au aoga i Salelologa i Savaii. O loo faailoa mai ai o loo ausia e le Aoga Tusi Paia se tasi o ana sini autu, ina ia faatupu le agaga e sailiili atili ai i le Tusi Paia, ina ia mausali le ola faa-Kerisiano ma loloto le ola faaleagaga, mo latou o loo autovaa mai e auai i vasega a Faiaoga Malua. O le agaga o le faafetai e faaleoina mo latou uma o loo faaavanoa mai a latou taimi, tatou te mafuta ai i vasega ma faasoa i le Talalelei ia Keriso ma soo se Kerisiano, e pei ona i ai le auunaga a le Aoga Tusi Paia a Malua. E faafetaia foi le Susuga i le Toeaina Faatonu Leaso Tupa'i, ma Susuga i Toeaina ma Faafeagaiga ma aulotu o le Matagaluega Faasaleleaga, ona o le tausia lelei o Faiaoga Malua i o latou apitaga, mo vasega uma o loo faia i Salelologa. E faafetaia foi le Susuga i le Failautusi Aoao Rev Dr Taipisia Leilua FS, o le Faatonu Aoga EFKS Susuga Rosita Esera ma le Komiti Aoga, mo le tuuavanoa mai o le Maota Tupulaga EFKS i Mulinuu, faapea le Kolisi i Malua Fou, ma le Aoga Matātā-Eseese i Salelologa, auā vasega o le Aoga Tusi Paia a Malua i Salelologa faapea ma Apia. A o se tala fiafia mo le Kuata lua o lenei tausaga, o lea ua faamautu mai le Matagaluega Itu o Tane ma le Susuga i le Toeaina Faatonu Amuia Seuala, o le ā amata ai vasega i le EFKS Samalaeulu i le Susuga Toeaina Palemia Tauiliili, mai le Aso Faraile 07 Iuni 2024. Faamanuia tele le Atua auā le Fono Tele mo lenei tausaga.

Faafetai,  
Alesana Pala'amo  
**Soopu Aoga Tusi Paia a Malua**

## MASTER PROGRAMME


O le tausaga lona tolu lenei talu ona amatalia le polokalame o le Master of Theology i totonu lava o le tatou Kolisi. E toa sefulu (10) i latou o auai i lenei polokalame i Faafeagaiga, Faifeau, Sikolasipi ma A'oa'o, i ona vaega e lua. Muamua, e toa ono (6) o loo tauaveina mataupu mo lenei tausaga, 2024, ma le faamoemoe e fai a latou suesuega ma tusiga i le tausaga fou, 2025. Ma le vaega lona lua, e toa fa (4) o loo feagai ma suesuega ma tusiga o latou pepa, ma le faamoemoe e faauu i le faaiuga o lenei tausaga, pe a manuia le taumafai.

O loo taoto le faamoemoe e tatala le avanoa mo A'oa'o i'u mai Malua, o Faifeau ma Faafeagaiga i atunuu mamao sa aoaoina i Malua, e fia auai i lenei polokalame i le tausaga fou, 2025. O le a faaoga mo lenei vaega fesootaiga faanei -onapo (online zoom) mo vasega i taimi talafeagai mo Faiaoga ma i latou e tauave mataupu, ae faaoga taimi o le Fono Tele (masina o Me) ma le Mafutaga Faafouina a Faifeau (masina o Aukuso) mo faatalatalanoaga ma presentations a i latou e tusi pepa. O aiaiga uma mo le polokalame o loo faailoa atu i luga o le upega tafailagi a le Kolisi mo le silafia. Afai ae faataunuaina lenei laasaga fou, o le a logologo puialii pea lo outou mamalu i taimi faatulagaina mo tusi talosaga ma isi vaega e moomia (i se taimi o lenei tausaga), auā le iloilo ina ma le faamalieina o aiaiga uma o le polokalame.


E momoli le faafetai tele i Tamā o le Ekalesia, o Tamā foi o le Kolisi ma outou Faletua, le Ekalesia Aoao i le nofo a Faafeagaiga, Faletua, Aulotu, faapea matua ma aiga mo le tatalo ma le tapuaiga o loo manuia ai lenei polokalame.

## FAALAUILOA A LE KOLISI I ANA TUSIGA


O le agaga faafetai i le Atua ina ua maua le avanoa o le Alii Pule ma le Kolisi o Malua e faalauiloa ai nisi o tusiga a le Kolisi a o feagai le Ekalesia Aoa ma lana Fono Tele 2024. O se tasi o manulauti na faamaite e Tamā o le Ekalesia mo le lumanai o le Kolisi. O tusiga e atagia ai foi le agaiga o suesuega o le Tusi Paia i leni talutalufou.




O tusi sa faalauiloaina e aofia ai le *Suesuega o le Tusi o Faaaliga* ua tusia i le Gagana Samoa. O leni tusi sa tusia lava e le Susuga i le Alii Pule, Susuga i le Faifeau Porofesa, Vaitusi Nofoaiga, o se toe faauigaga o le tusi a Faaaliga, aemaise o le faamoemoe ina ia tali nisi o fesili o loo fesiligia ai le uiga o lea tusi e tagata lautele. O nei fesili e aofia ai le mataupu e faatatau i le taimi ma le tausaga e toe afio faalua mai ai le Alii Faola. E le gata i lea o le faauigaina o fuainumera ma nisi o vaaiga o loo mamamu ai le tusi o Faaaliga. O ni mataupu ua talafeagai ma taaviliga o le sosaiete faapea le soifua molimau o tagata faatuatua, ma tagata o le EFKS.



I le tusi ua faaulutalaina o le *Catch the Bird but Watch the Wave* o ni tala eseese ua lalaga faatasi. O lona aotelega o le toe faatatauina o le tala i le alii mauoa o loo faamauina i le Luka 18:18—30. O leni toe faatatauina, e faaogaina ai e le Susuga i le Faifeau Faiaoga Foma'i o Fatilua Fatilua lona siosiomaga o se tagata faitau e suesueina ai le lalolagi o le tusitala o Luka, ae maise o le sootaga o le aiga, tamaoaga, ma le soifua faa-soo.



E le gata la o nei tusiga, ae sa faalauiloaina ai foi nisi o tusiga faifaatasi a Faiaoga Malua i le tusi o le *Tafatolu 2024*. O se faamaopoopoga o tusiga i le gagana Samoa sa fofogaina i le Faafouina o le 2023, ma le Pepa na saunia mo le Fono Tele 2023. Faatasi ai foi ma se tusiga faavaomalo a le Kolisi ua ta'ua o le *Samoa Journal of Theology*, o loo tuufaatasia ai nisi o pepa sa folasia i le OBSA 2023.




O le tusi ua taua o le *Unsettling Theologies*, e toe faatatauina ai e le Susuga i le Faifeau Faiaoga Foma'i ia Brian Fiu Kolia le Tusi Paia mo se suesuega o aafiaga o pulega faakolone i tagata o le Pasefika. O se tasi o sini o leni galuega ina ia vailiili aafiaga o tagatanuu muamua o le Pasefika ona o pulega faakolone. E le gata i lea ina ia mafai ona toe iloiloaina nisi o mataupu o loo taotaomia ai tagata o le sosaiete, e ono mafua mai ona o pulega faakolone.



### VAEGA FOU I LE LIBRARY (MALUA STAFF PUBLICATIONS)

Ua faalauteleina ma faalauiloaina e Faiaoga o le Kolisi FaaFaifeau i Malua lo latou silafia i le tulaga fa'amataupu silisili. O le toatele o Faiaoga, e maualuluga tulaga ua ausia ae maise i tusiga. I le faamanatuina o lea tulaga, ua faapitoa ai e le Faletusi i Malua se vaega e ta'ua o le "Malua Staff Publications." I totonu o leni vaega, e mafai e Susuga i A'oa'o ma Faletua ma soo se isi lava ona faitau i nei tusiga. O se vaega taua lava e faamanatu ai ma fiala faatasi ai i le faalauteleina o le taumafai a le tatou Kolisi i le



va ma isi aoga Faafaifeau a le Pasefika.


### ASIASI MAI LE UNIVESITE O OTAGO

O le malaga mai ai o le faaululuga o le Univesite o Otago i le masina o Mati i le tausaga nei, mo sa latou feiloaiga ma le Univesite Aoa o Samoa, na afea ai foi le Kolisi i Malua. Na maua le avanoa e saunoa ai se tasi o alo o Samoa o loo faiaoga ai i le Univesite i Otago, le afioga ia Leena Porofesa Siautu Alefaio-Tugia. O le tamaitai Porofesa e i ai ona faailoga fapitoa i sailiiliga o le mafaufau (Psychology). I lana folasaga i lea aso, na ia otooto ai nisi o faafitauli o loo matauina o aafia ai tupulaga o le vasa Pasefika. O le Susuga lava i le Alii Pule o le Kolisi i Malua, Porofesa Vaitusi Nofoaiga na saunoa faafeiloa'i ma faafetaia le avanoa ua maua e faaso mai ai i nisi nei o vaega taua tele mo le silafia e Aoa ma o latou Faletua faapea le aiga Faiaoga. Na faaiu lea feiloaiga i se taumafataga māmā faatasi ai ma nai meaalofa o ie elei mo le malaga, na saunia e le Faletua o le Susuga i le Alii Pule ma le mafutaga a Faletua.

## TUSIGA FAIAOGA

## SAMOA JOURNAL OF THEOLOGY (OBSA SPECIAL EDITION)

I le lomiga lona tolu o le tusiga a le Kolisi, le *Samoa Journal of Theology*, sa tuu faatasia ai se lomiga faapitoa o pepa a sui auai o le fonotaga o le Oceania Biblical Studies Association (OBSA) sa faia i Malua i le tausaga ua mavae atu (silasila Maluapapa Lomiga XLIX Novema 2023). O lenei lomiga faapitoa, o loo aofia ai nisi o saunoaga autu a Susuga i Porofesa na faia i le OBSA, e pei o le Susuga i le Alii Porofesa ia Mark Brett mai le University of Divinity i Melephone i Ausetalia, ma le Faifeau Porofesa ia Paul Trebilco mai le Iunivesite o Otago i Niu Sila. O loo i ai ma pepa a Faiaoga o le Kolisi atoa ma nisi o tagata susesue iloga o le itulagi o le Vasa Pasefika, e pei o Jione Havea, Mark Henrickson ma Robyn Heckenberg. E fia faaleoina le agaga faafetai a le Susuga i le Alii Pule ia Vaitusi Nofoaiga ma le Kolisi ona o le tapuaiga a Tamā o le Ekalesia ma le Ekalesia Aoa o ana galuega faatino e ala i ana tusiga ma susesuega, ia fai ma viiga o le Atua.



## LOMIGA 3, NUMERA 1 2024.



**“Humans and Other Creatures: Renewing ‘Animist’ Shalom.”**

*Prof. Mark G. Brett (University of Divinity, Melbourne Australia)*



**“God’s Good and Holy Creation, and the Climate and Health Crises (1 Timothy 4:4-5).”**

*Rev Prof. Paul Trebilco (University of Otago, New Zealand)*



**“Moana criticisms: Recollecting biblical studies in Pasifika.”**

*Rev Dr. Jione Havea (Trinity Methodist College, Aotearoa/ Charles Sturt University, Australia)*



**“Reforming the theology of work and health.”**

*Prof. Mark Henrickson (Massey University, New Zealand)*



**“De-silencing Naaman?: A Riverine Reading of 2 Kings 5:1-14.”**

*Rev Dr. Brian Fiu Kolia (Malua Theological College, Samoa)*



**“Reading Psalm 104 with *Heliaki* in the context of climate and health crises in Tonga and Oceania.”**

*Rev Dr. Makalofi Kakala (Sia'atoutai Theological College, Tonga)*



**“‘Not a Hoof Shall Be Left Behind’: Animals and Liberation in the Exodus Traditions.”**

*Dr. Megan Turton (University of Divinity, Melbourne Australia)*



**“Re-examining Mark 8:22-30 from a Samoan *fa'usoagia* reading: Reversing the twelve disciples’ failure analogically.”**

*Rev Dr. Visasio Saga (Malua Theological College, Samoa)*



**“Whose Judgment?: Climate, Health, and a *Mālie/Lēmū* Interpretation of the Haggai Text.”**

*Rev Dr. Pasesa Sapolu (Kanana Fou Theological College, American Samoa)*



**“Lost in translation: navigating our sea of islands in a catamaran ... but where is my waka?”**

*Dr. Terry Pouono (Laidlaw College, New Zealand)*




**“Health Crises, Healing Stories, and God’s Good Medicine.”**

*Rev Dr. Miryam Clough (St John’s Theological College, New Zealand)*



**“Who is the ‘us’ God is referring to in Genesis 1:26? Reading Genesis 1 from a Samoan Perspective of Creation.”**

*Rev Dr. Arthur John Wulf (Malua Theological College)*



**“Eco-theology and Indigenous contexts in 1 Kings 3:28.”**

*Assoc Prof. Robyn Heckenberg (Curtin University, WA Australia)*




**“Fungal Reflections: A Defiling Mould.”**

*Ms. Ruth Wivell (St John’s Theological College, New Zealand)*

## TAFATOLU

## Tusiga ma faamatalaga pupu'u mo le lomiga o le Tafatolu 2024.



E pei ona masani mai ai i tusiga ua mavae, o tusiga nei ma ni faamatalaga pupu'u o le a mafai ona mauaina i le lomiga o le Tafatolu mo le Fono Tele 2024. O nei tusiga sa muamua ona fofogaina ai le au faigaluega i le Mafutaga Faafouina Faifeau, 2023, ma ua tuufaatasia mo le lomiga o le Tafatolu 2024.



### 1. Ina Tatou Faia ia le Tagata i lo Tatou Faatusa, ia Foliga ia i Tatou...O ai Tatou?

*Arthur Wulf*

O le auga o leni pepa o le toe fia asia lea o le fetalaiga foafoa a le Atua i le faiga o le tagata o i le Kenese 1:26. O le isi leni fuaiupu o le Feagaiga Tuai o loo fefulisai pea e le au suesue lona faauigaina i le tausailia lea po o ai tonu lea e fetalai iai le Atua; ia po o ai tatou lea e faatatau i ai le fetalaiga a le Atua.



### 2. PEPA FONOTELE 2023 – “O atu ia e faamalolo ma faasaoloto o’u tagata” (Mataio 10:8)

*Malutafa Faalili*

O leni su'esu'ega o se toe vaavaai lea i le taua o le galuega fa'amalolo e tusa ma le molimau a Mataio.1



### 3. O Paulo ma le Tulafono: Suesuega o le vaogagana o le Roma 2

*Fatilua Fatilua*

O le 'au'au o leni faatufugaga, o se faatalanoaga o le mataupu e uiga ia Paulo ma le tulafono, ae taula i se suesuega o le gagana ma le vaogagana o le tusi a Roma i lona mataupu e lua.



### 4. O le Tootoo ma le Tusi Paia

*Vaitusi Nofoaiga*

O le faamoemoe o leni pepa, e faasoa ni motugaafa mai le faitauina o le Tusi Paia, i le taua o le tootoo, e faa-autu i le fetalaiga a Iesu i ona soo e ta'ua ai le tootoo (Mareko 6:8), ina ua auina atu na o i latou e o, e faata'ita'i le faatinoga o le galuega. E afea foi se taua o le tootoo i le tatou Aganuu ma le faaSamoa.



### 5. Se isi Vaaiga i le Faaliuefuefu (Cremation) mai le Feagaiga Tuai

*Samasoni Moleli*

O le faaliu efuefu o tino maliu (cremation), e le o se mataupu e fou. Sa faatalanoa muamua leni mataupu i mafutaga faafouina a Faifeau i le tausaga e 2012 ma le 2013. Talu ai o le tausaga lava lea na uluai oo mai ai masini faaliu efuefu nei i Samoa (2012, ae tatala aloaia i le 2013), e taua ai le toe asia o leni mataupu, ona o mafuaaga nei: (1) ua silia ma le 200 tagata ua faaliu efuefu i Samoa; (2) ua talia aloaia e le malo o Samoa lea faiga.



### 6. Faafalelemalu: O le EFKS ma ona Nafatausi Faafailele

*Clarke Stowers*


O leni taumafaiga o le a faaaogaina ai le upu 'Faafalelemalu' e toe asia ai le sao o le Ekalesia i le faafaileleina o le atamai e ala i le faatutuina o ulua'i aoga i laufanua o Samoa.



### 7. “Sei tatala le fofoga o Naamanu?”: O se Faitauga Faa-nuu-o-vaitafe o le 2 Tupu 5:1-14

*Brian Kolia*

O se toe faitauga o le tala ia Naamanu i le 2 Tupu 5, mai le vaaiga o tagata e alaala i nuu o vaitafe.



### 8. Faaiipoipoga Itupa Tutusa (Gay Marriage)

*Faiaoga Malua*

O le faasoa a leni suesuega, o le faaleo lea o se aotelega o le talanoaina e Faiaoga, o le mataupu, o le 'Faaiipoipoga o Itupa Tutusa – Gay Marriage'.



### 9. Tagata mo le Atua, ae lē o le tagata mo le Tamaoaiga

*Esera Esera*

I leni vaitau i le masausau o le soifuaga ma le mau suiga tetele ua aafia ai le sosaiete, o le tele lava o faafitauli ogaoga ua alia'e nei, e fesootai ma le itu tau tamaoaiga. O leni pepa, o loo asia ai se tasi o faafitauli o 'manatu tausili o le tamaoaiga' (*economic ideology*), o loo faatusaina ai le tagata o se mea faigaluega o loo auauna i le tamaoaiga (*economic man*).



### 10. O le Tuutuu Laau Faamanulaiti a Ioane Viliamu; 1814 – 1830

*Leuelu Setu*

Ua toe aumai leni muagagana e faamanatu ai le folau mai a le Misionare ta'uta'ua o Ioane Viliamu i le Sami i Saute (South Sea) e aumai le Tala Lelei seia oo ina paia o tatou laufanua i Samoa nei. E le gata i lea, e faamatala ai foi le tuutuu laau mai o le soifuaga ma le sailiga o le poto masani ma le atamai o le alii Faifeau i le galuega faamisionare.



### 11. Galuega Kerisiano mo Tupulaga Talavou a Samoa

*Alesana Palaamo*

O se tasi leni o vaega tāua i totonu o soo se Galuega Kerisiano, o lana Tupulaga Talavou. O le aoaoina o le fanau (faapea soo se vaega o le aulotu), e faamamafa ai le malamalama i tala o le Tusi Paia, o talitonuga ma faatuatuga o le Ekalesia, faapea tu ma aga o le Kerisiano moni. O le ala lea e faataua ai Aoaoga Kerisiano, e pei foi ona faati-noina i le Ekalesia ma aulotu i le taimi nei.



## INTERNATIONAL CONFERENCES

### FONOTAGA WHITLEY COLLEGE, TALANOA OCEANIA, MA OTIN TA'AI +20 SUVA I FITI.

Sa auai atu nisi o Faiaoga i fonotaga faapitoa sa faia i fafo atu o Samoa. O le aso 7 o Mati, sa faia ai le fonotaga i le Whitley College ua ta'ua o le “Interdisciplinary Perspectives on Migration and Religion in Australia and the Pacific”, na auai atu ai Rev Dr. Brian Kolia ma na ia saunia ai se pepa ua faaigoaina: “The Bible, Migration and the Changing Face of Christianity in the Pacific.”

I le aso 4-6 Aperila, sa faia ai le fonotaga a le “Talanoa Oceania”, o paaga masani a le Kolisi, na faia lea i le United Theological College, North Parramatta, i Ausetalia. Sa auai atu ai le Susuga ia Rev Dr. Alesana Pala'amo ma le Susuga ia Kolia, e fai ma sui o le Kolisi. Na saunia e le Susuga ia Pala'amo le pepa ua faaulutalaina: “Faith development the Samoan way: An exploration of how Samoan children develop in faith.” A o le Susuga ia Kolia na saunia le pepa: “Whose trauma is it anyway? A *tausua* reading of God and the Leviathan in Job 41.” I lea lava fonotaga, sa faailoa ai le tusiga fou a le Susuga ia Kolia (co-editor ma le Susuga i le Porofesa Lagolago ia Michael Mawson mai Auckland University) ua faaigoaina: *Unsettling Theologies: Memory, Identity and Place*.

I le aso 5-9 Me, sa faia ai i Suva, Fiti, le fonotaga a le Pacific Conference of Churches ua faaigoaina o le “Otin Taai +20 Conference: Pacific Churches for Ecological Stewardship and Climate Justice”. Sa auai atu le Susuga ia Rev Dr. Samasoni Moleli e fai ma sui o le Kolisi i lea fonotaga. O le faamoemoe o lea fonotaga o le faia lea o suesuega faamataupu silisili ma le Tusi Paia, auā ni mafaufauga ma ni auala fou e fo'ia ai le soona fai o le siosiomaga ma le fogasami, ua aafia ai le lalolagi ma faateteleina ai suiga ogaoga o le tau.

E faafetaia le lagolagosua o le Komiti o Tamā o le Ekalesia ma le tapuaiga a le Ekalesia Aoa, a o feagai Faiaoga ma ia fonotaga taua e faalateleina ai le iloa, auā le aotauina o alo ma fanau talosia a le Ekalesia i totonu o le Kolisi.



## POLOKALAME ASO MALIU & TOETU VASEGA FAAIUASO



E tumau pea le viiga ma le faafetai i le Atua ina ua mafai ona faataunuaina le polokalame o le Aso Maliu ma le Toe Soifua mai o lo tatou Alii Faaola e ala i le tala ma pese, faatasi ai ma siva faaevagelia sa faatinoina e le Vasega Faaiuso i le Aso Lua, 26 Mati 2024. O lenei polokalame sa taitaia lava e le Susuga i le Alii Pule ia Rev. Prof. Vaitusi Nofoaiga e ala i se sauniga, ma sa pueina ma faasalalauina i luga o le ala-ata a le EFKS, le TV2.

## FAAMULI O LE ESETA -TAUSAGA MUAMUA

O le viiga ma le faafetai i le Atua ina ua faamanuaina le taumafai ma ulufale mai i le Kolisi Faafaifeau i Malua mo lenei tausaga, 2024. E to'a luasefulu ma le ono (26) A'oa'o ma le sefulu ma le fa (14) o Faletua o le matou vasega, peita'i, e lei mafai ona faaauaina le taumafai a A'oa'o Sikolasipi se toalua mai le Ekalesia Tuvalu ona o ni gasegase o le tino. O lo'o aofia ai ma A'oa'o mai Tuvalu e to'atolu (3) ma le A'oa'o e to'atasi mai Tokelau. O aso o le tuuaga o le Eseta (29 Mati-1 Aperila) na faataunuaina ai la matou faamuli, ma matou iloa ai nisi vaega t'aua o le ola a'otauina i totonu o le Kolisi. O se taimi t'aua foi sa fesoasoani ai i faigalotu o le Aso Maliu, Aso Sa o le Toetu, ma faigalotu afiafi. O feau ma galuega e aofia ai le gaseseina o taumafa, fafagaina o meatua'olō, vaaia o manupapalagi, faamamaina ma le leoleoina o le aai a o feagai ai le Kolisi ma malologa o le Eseta. E momoli la matou faafetai i le Susuga i le Ta'ita'i faamuli, Rev Prof. Vaitusi Nofoa'iga ma le Faletua, Susuga i Faiaoga ia Tafatolu Tapaleao, Faafetai Koria, ma Hobert Sasa ma o latou Faletua, faapea le Peresetene ma le Failautusi ma o la Faletua mo le ta'ita'iga o le faamuli. Faafetai i Susuga i Faafeagaiga ma o latou Faletua, o aulotu, uō ma ē masani, ae maise o matou aiga i le tatalo ma soo se ala na mafai ona fesoasoani mai ai. Faafetai tele lava, A'oa'o ma Faletua, Tausaga Muamua.



## ASO SA O TINA



E tulaga ese lenei tausaga i le Aso Sa o Tina i Maluapapa nei ina ua mafuta mai nisi tina ma Faletua o Faafeagaiga o le Ekalesia ona o usugafono mo le Fono Tele 2024. Na taitaia e le Susuga ia Tafatolu Tapaleao le sauniga o lea Aso Sa taua, ona saunoa lea o le Tama Pule e faafeiloa'i ma faafetaia le mamalu o le Ekalesia ua mafuta mai i lenei Aso Sa o Tina, e le gata i lea o la latou tatalo ma tapuaiga o loo manuia ai pea le Kolisi. Na saunia e le Susuga i Faiaoga, Aoa ma Faletua o le Faamuli nai mealofa mo Tina o le Kolisi ma le aulotu, faapea foi nisi tina o le Ekalesia na auai mai i lea Aso Sa.

## MAFUTAGA A A'OA'O MA FALETUA

I le ava ma le fa'aaloalo tele e tuuina atu ai se ripoti pu'upu'u a le mafutaga a A'oa'o ma Faletua o lenei tausaga 2024. O le aofa'iga atoa o le Kolisi i A'oa'o ma Faletua e 178. O le aofa'iga o A'oa'o o le Tausaga Muamua e 26, e 14 i latou ua fai aiga (Faletua) ma le to'a 12 i latou nofo toatasi. O le Tausaga Lua e 32 A'oa'o, e toa 17 A'oa'o ua fai aiga ae 15 A'oa'o nofo toatasi. O le Tausaga Tolu e 24 A'oa'o, e toa 18 A'oa'o ua fai aiga (Faletua) ae toa 6 e le i faia ni o latou aiga. O le Tausaga Fa e 27, e 20 A'oa'o ua fai aiga ae toa 7 i latou e lei fai aiga. E toa 15 A'oa'o Sikolasipi mai le Pasefika, e toa 5 mai Tokelau, e toa 8 mai Tuvalu ae toa 2 mai Kiribati. E viia ma faafetaia le alofa tulituliloa o le Atua ona o lo'o manuia uma le mafutaga i lona agalelei. E ui i faafitauli tau faama'i pepesi sa aafia ai i nisi o taimi peitai e lei vaioa ai le tagata faatuatua e saili i le Atua e faatonufoiau i le folauga. E tu mati'e lava le maualuga o le ola aotauina i totonu o le Kolisi ona o le atoa ai o le tafatolu o le ola o le tagata soifua, e le faagaloina ai le galuega faasoa a le Susuga i le Porofesa ia Vaitusi Nofoaiga ma le mamalu o le aiga Faiagoa i le a'oa'oina o Mataupu ese'ese i Matagaluega o le Feagaiga Tuai, Feagaiga Fou, Tala Faasolopito o le Ekalesia, Mataupu Silisili ma le Faiva Alofilima o le Mataupu silisili, a o le tōfā sasaa mai le Susuga i le Porofesa ma le aiga Faiagoa i le taialaina o le ola a'oa'oina aemaise lava le tapenaina o tapuaiga ma sauniga i le Atua, e taiala ai e ala i le ola tapenapena mamao ma ia faamamafa le taua o le ola tapuai i le Atua. Ua fai lava lea ma faatupu malosi i valaauina ese'ese i totonu o le Kolisi i ana feau ma polokalame fai e aofia ai ma'umaga, pa povi, ma lo'ilo'i. A o le faamatagofieina o laufanua ma nofoaga ese'ese ua le gata i A'oa'o, a o Faletua foi i le latou pitolaau faatinā. E iai galuega faapitoa a le Kolisi mo A'oa'o ua i ai le tomai ma agavaa na faauuina mai, ma o nei agavaa ua fesoasoani tele e faaleleia ma faafou nisi o mea totino a le Kolisi e pei o le Au-kamuta ma le faaleleia o le vaitaele i Tofuola. O le vaega a le au fai Eletise ma le Palama ua fesoasoani e faaleleia nisi o vaega o manaomia, aemaise lava le Fale Mafutaga a le Kolisi faapea maota o Faiagoa. O le vaega o femalagaiga e pei ona iai ave taavale e momoli ma le pikiina o tamaiti aoga mo aoga i vaiaso taitasi. O le Canteen ua fai ma faamāmā avega mo le tausiga lautele o aiga faapea le Mafutaga i aso taitasi. E le fa'agaloina foi le sao o le vaega a le IT mo soo se fonotaga ma le tapenaina lelei o vaega uma faatekonolosi aua mea fai a le Kolisi. O le au sa Levi ua iloga lava o latou tiute e ala lea i le taina o le lali ma ia mautinoa lelei le atoatoa o tapenaga aua le sauniga i aso o Sermon Class faapea foi sauniga lotu o le Aso Sa. O tiute faatina e gafa lava ma le mafutaga a Tina ma o le latou nafa tausii o le teuteuina o le malumalu i so'o se aso e faatino ai sauniga ma tapuaiga a le kolisi. E pei ona iai le taligamalo mo le SQA i lenei tausaga. O le auai mai ai o le auaigaluega a le Ekalesia sa i ai foi lo latou sao i le tapenaina ma le faatotogaina o potu e mapu ma tofafa ai le ofisa o le Fono Tele faapea le auaigaluega a le Ekalesia. O le faamamāina o le lotoa o le latou anavatausi lea i Aso Gafua o vaiaso taitasi ina ia mautinoa le sologa lelei ma le matagofie o le aai i ona itu uma. O Aso Lua o vaiaso taitasi e faia ai a latou Polokalame o mea taulima, a o se fiafiaga foi lea i Faletua ona o le tamaoaiga sasa'a mai e ala i le taitaiga a le Faletua o le Alii Pule faapea Faletua o Faiagoa e ta oso ai pea le ola aoga i totonu o Malua. E momoli ai le agaga o le faafetai tele i lau Susuga i le Porofesa ma Faiagoa ma o outou Faletua ona o le taitaiga i nei polokalame ma galuega uma. O se Ripoti puupuu lea mai le mafutaga a A'oa'o ma Faletua o lenei tausaga 2024. Faafetai.

Peresetene; Afasene Junior Falanai ma le Faletua Taufu'a Tutaima Falanai

Failautusi – Viliamu Su'a Eletise ma le Faletua ia Rosehill Eletise

## TAALOGA A LE KOLISI 2024

O se tala 'oto'oto lenei o taaloga a le Kolisi Faafaifeau i Malua, e pei ona faagasolo mai ai i le amataga o lenei tausaga faalea'oa'oga.

E tolu(3) taaloga o loo faatinoina i le Kolisi e A'oa'o; o le lakapi pa'i,(touch rugby), soka (soccer) ma le kirikiti Samoa. O Faletua i le taaloga Volipolo. E lua 'au ua vaevaeina i ai A'oa'o; o le au lanu pa'epa'e (White team) ma le au lanu uliuli(Black team). Ae tolu vaega (division)ua vaevae i ai 'au taitasi; o le A, B ma le C. E taaalo muamua i vaega o le A, B, C, i le lakapi ma le soka, ona faai'u lea i le taaloga soka e tuufaatasi ai le A, B, ma le C. O loo tutusa le malolosi o au e lua o le Uliuli ma le Pa'epa'e i le faaiuga o le kuata muamua. I le kirikiti Samoa a A'oa'o, e fa(4) 'au ua vaevaeina i ai; o le Lanu mumu, Lanu moana, Samasama ma le Lanu meamata. E faasolo au uma e taaalo i le talita, ma o le taimi nei o loo umia e le au Lanumoana le talita. I taaloga volipolo a Faletua, e vaevaeina foi a latou au taalo i lanu; Lanu meamata, Lanu mumu, moana ma le piniki. E faataamilosaga foi taaloga e saili ai le siamupini i le tuufaatasiga o manumalo a le au. O le faamoemoe autu o nei taaloga ia maua pea le soifua maloloina lelei e ala i faamalosi tino i aso Tofi taitasi. A o se avanoa foi e mapu ifo mai aoga faapea feau ma galuega o loo feagai ai.

Komiti o Taaloga Faiagoa: Rev Dr Brian Fiu Kolia; Rev Dr Fatilua Fatilua; Rev Clarke Stowers;

A'oa'o Faai'uaso: Vincent Faafo; Sebastian Tuifao; Opetai Samuelu; Kaleuati Tusi. Faafetai, Kaleuati Tusi. (Sui o le Komiti o Taaloga).





## FALE TUSI FOU MO LE KOLISI

Ua taliaina nei e le Fono Tele, 2024, e tauala atu i se mau tuu sao mai le Komiti o Tamā o le Ekalesia, le Faletusi fou mo le Kolisi, e pei ona fuafua mai ai i ni tausaga ua mavae. O lenei galuega tele sa faamaite mai e le Sosaiete a Malua Tuai (SMT). E ui ina sa taatia mai mo se vaitaimi ona o ni mafuaaga tataua, a o lenei ua toe lalaga ma pasia loa lona faatinoina, i lalo o le faautautaga a le Komiti Tupe ma le taitaiga a le Komiti o Feau Eseese.

Sa toe silasila le Alii Pule ma Faiaoga i ni suiga talafeagai mai le ata sa mua'i tapenaina e le SMT, ina ia faamalieina ai manaoga faapitoa o le Kolisi i le faaogaina o le faletusi, e lē gata i manaoga eseese mo se faletusi lelei, manaoga faa-tekonolosi i nei vaitau, a o le faatinoga o polokalame tau-a'oa'oga a le Kolisi, faapea foi se potu faapitoa mo le Ekalesia Aoa (archive). O le a tele se suiga mai le faletusi tuai o loo i ai i le taimi nei, ma o se laasaga maualuga lea ma talafeagai lelei mo le agai i luma o le Kolisi i aoaoga ma suesuega i le Tusi Paia ma ona Mataupu Silisili. Ae maise ai o le siitia o mataupu ua faatulagaina mo le polokalame o le Master of Theology ua faagasolo nei, ma se silasila mamao i le faailoga maualuga o le Fomai o le Tofā Mamao (PhD). E faafetaia pea ma le loto faagae'etia le

faamaite ma le lagolagosua a le SMT mo le Kolisi i taimi uma, ae faapea foi le naunau mai o Tamā o le Ekalesia ma le Komiti Faatonu a Malua ma le Ekalesia Aoa, i fuafuaga uma mo le lumanai manuia o le Kolisi ma ana galuega. Ia faamanuia le Atua.



## MOTU LE PA

### A'OA'O MAI ISI EKALLESIA O LE PASEFIKA

A o gasolo ai feau ma galuega faaleaoaoga a le Kolisi i lea tausaga ma lea tausaga, e lē o tuua ai lava le auai mai o sui mai isi Ekalesia o le Pasefika, e aotauina i totonu o le laumua i Malua. I le Tausaga muamua, o loo i ai le A'oa'o ma lona Faletua mai le Ekalesia Faapotopotoga Kelisiano Tokelau, o Sakalia Sakaio ma le faletua ia Fiailoa. O A'oa'o e toalua mai le Ekalesia Kelisiano Tuvalu, o Manulele Ionata ma le faletua ia Tealofi Peleti. I le tausaga lua, e toalua A'oa'o ma le faletua mai Tokelau, o Galu Faamaoni ma le faletua ia Urima; o A'oa'o e toalima mai Tuvalu, o Kulue Telala, Makaili Matatia, Malau Alasa, Richarf Tau, ma Tepaula Vaega. I le tausaga tolu, e toalua A'oa'o ma le faletua mai Tokelau; o Ioane Sosene ma le faletua ia Tuvale, faapea ma Tui Paulo ma le faletua ia Mavaega. i le tausaga fa, o loo i ai A'oa'o mai Tokelau, o Elisara Isaako, ma le toalua mai Kiribati Uniting Church, o Iuti Teruka ma Teturunga Toaba.

### VAVAO O LE DENGUE FEVER

O le naunautaga lava i le susuga i le Alii Pule ma Faiaoga, o le saogalemu lea o le soifua o tagata uma. O le aso 8 o Aperila sa a'e ai le tofa i le susuga i le Alii Pule ma Faiaoga ina ia malolo aoga mo le vaiaso atoa (8-14 Aperila) ona o le pepesi o le fa'ama'i o le dengue fever i lenei vaitaimi. O se finagalo lava ina ia mautinoa le malu puipuia o tagata uma aemaise o nai fanau. Sa faaauauina pea polokalame masani a le Kolisi e ala i le Lotu Taaeo (Morning Devotion) ma aoga sa faaogaina ai upega tafailagi (Moodle/Zoom). Ua aoga foi mea na tutupu e pei ona i ai le Koviti-19, ua lava tapena ai le Kolisi i fesootaiga faanapo nei. E sili lava le puipuia nai lo le tau togafitia.

### LOTU AULEOLEO

O se tasi vaega taua i le Ekalesia Faapotopotoga Kerisiano Samoa, o le faatauaina lea o le tatalo. O le tausaga lenei na toe amatalia ai le Lotu Au Leoleo a le Kolisi Fa'afafeau i Malua, aua o se polokalame tāua i totonu o le Ekalesia. E ui i le pisi o le faasologa o polokalame fai a le Kolisi, ae o loo faatinoina pea lea vaega taua, ma ua maua ai le taimi e faatino ai i le lima (5am) i le vaveao o Aso Lulu. O le naunautaga a le Susuga i le Alii Pule, ina ia faataua le ola tatalo aua faiva ma tiute o loo feagai ai ma le Kolisi. E le gata i lea, o le tatalo foi mo le Ekalesia Aoa, o aiga, nuu, ma Ekalesia o lo'o tapua'ia le alo faiva o alo ma fanau i feau ma galuega.

### MEALOFA - PUSA AISA FOU A LE KOLISI

Sa fai mealofoa le vasega lagolago 2024 mo le Kolisi i Malua, e ala i se pusa aisa fou ma le telē, aua le teuina malu ai o mea taumafa aua mea fai a le Kolisi. O le matau a le vasega lagolago, o se tasi lava lea o aafiaga tele i le tulaga tau gasesega, i tausaga ua mavae, o le leai o se pusa aisa lelei ma le telē, ma ua le tuua lava le agaga fia tautua ma le fai mea sili

O le tausaga tolu (po o le vasega lagolago) e nafa ma le gaseseina o taumafa a le Kolisi, aua ana fonotaga ma polokalame aloaia. O mea ua faia ua lelei, fai ma viiga o le Atua. Malo le saili, malo le silasila aua le Kolisi ma lona faamoemoe.

## FAAFOUINA VAI TAELE A LE KOLISI



O le naunautaiga lava i le Susuga i le Alii Pule ma Faiagoa, ia faatumauiina le matagofie ma le aulelei o luma maota o le Kolisi. O le ala lea o le a'e ai o se tofa ina ia toe faaleleia le vai taele o loo i lumafale. O le galuega sa faatinoina lava e Susuga i A'oa'o e i ai o latou tomai faa kamuta ma tusiata, faatasi ma le lagolago a le nofo a suega i taimi e moomia ai. Sa faatupeina lava e le Kolisi lenei galuega tele. Tau ia ina ia fai ma viiga o le Atua galuega ua faatinoina mo le Aai talosia a le Ekalesia.



## MAOTA FAAFOUINA



O le tausaga nei sa toe fa'aleleia ai nisi o maota o Pulega i totonu o le Kolisi. E aofia ai Pulega a Logan (Kuiniselani i Saute), Ueligitone i Saute, Salega, Maugakiekie, Amerika, Waitemata, ma Asau. O galuega matagofie sa fitaituga ai pulega nei, aua le fai mai o le Ekalesia i lana Fono Tele. Ia saga viia ai pea le Atua i nei galuega lelei, ma ia faamanuia le Atua i le soifua galulue ma le ola faitaulaga e faia ai mea silisili mo le Atua ma Lana Talalelei. Ia faamanuia le Atua i Susuga i Toeaina, faapea le paia o Pulega taitasi, ma ia avea nei maota e fai ma fale o le Atua.

Pulega Salega



Pulega Asau



Pulega Amerika




Pulega Logan

## AUALA FAAFOUINA



O le amataga o le masina o Me na amatalia ai galuega o le toe faaleleia o auala i totonu o le Kolisi. O lenei galuega sa faatupeina e le Ekalesia, ma o le kamupani a le Uليا Construction sa nafa ma lenei galuega. Ua feauga lelei lenei galuega matagofie ma le amatalia ai o le Fono Usu a le Ekalesia i lenei tausaga. E lagona ai le agaga faafetai i le Ekalesia ona o lenei faama'ite tāua, aua le saogalemu o le fegasoloa'i i totonu o le Kolisi.



## FAAMASANI TAUSAGA 3 I NIU SILA 2025

I le faatofala'iga mamalu a Tamā o le Ekalesia poo le Komiti o Malua i lenei tausaga, ua finagalo autasi ma talia aloaiaina ai i le ulua'i taimi, le faatinoina o le Galuega Faamasani (Field Work) a Susuga i A'oa'o tausaga tolu ma Faletua i fafo atu o Samoa.

I le vaitau faa-le-aoga lona lua (semester 2) o le tausaga fou 2025, o le a faataunuuna ai le Galuega Faamasani a A'oa'o ma Faletua o le tausaga tolu i Aukilani Niu Sila i Matagaluega a Aukilani ma Manukau.

O lenei faamoemoe o le a faagasoloina i le vaiaso e tasi i le masina o Aokuso poo Oketopa, fua lava i taimi avanoa o Matagaluega ua filifilia, ma o le a taoto atu lava i Susuga i Tamā Toeaina Faatonu o Matagaluega ua filifilia e nafa ma le faasoasoina o A'oa'o ma Faletua i Faafeagaiga ma aulotu ua finagalo e faataunuuna ai le faamoemoe.

O le auga lava ina ia maua le silafia ma le iloa o A'oa'o ma Faletua i le faatinoga o le galuega Faafaifeau i le fesootaiga ma le soifuaga o loo olaina e tagata lotu EFKS i Niu Sila. O lona uiga, o le paganoa e sufia ai le oa i le silafia ma le tamaoaga i finagalo o loo taoto i le lotoifale Faafaifeau faapea lagona faa-tagata-lotu, ina ia tapenaina ai fanau talosia a le Ekalesia i le valaauina faa-soo o Keriso nei ma a taeao.

Tatalo i le Atua ina ia saunia se laolao lelei e faataunuuna ai lenei faamoemoe taua, ma ia maua pea e Tama o le Ekalesia faapea Faafeagaiga ma faletua tainane o tagata lotu le filemu ao galulue ai ina ia viia le Atua.

## SUI USUFONO A LE KOLISI MO LE FONOTELE 2024



O le Susuga i le Faifeau Fomai Faiagoa ia Visesio Saga na fai ma Sui Usu Fono tofia o le Kolisi Faafaifeau i Malua mo lenei tausaga 2024. E pei lava foi ona masani ai i tausaga taitasi o le sui usu fono lava a le Kolisi Faafaifeau e tapenaina le pepa e amataina ai le Fono Tele. O faamanuiaga ma alofaaga mai le Susuga i le Alii Pule ia Vaitusi Nofoaiga ma le Faletua ia Mile faapea le aiga Faiagoa ma Faletua ma le Kolisi i le feagai ai ma le usugafono o lenei tausaga.



## ATINA'E A LE KOLISI

### MAUMAGA MA TOGAFAI

O loo faaauau pea ona totoina fa'i fou i le togafai i le itu i sasa'e tuaoi ma Saleimoa. E tusa ma le 200 fa'i fou ua faaopoopoina i le faaiuga o le kuata ua mavae atu. O le faamoemoe ia lava pea taumafa i tuāmaota mo le fofoga taumafa o le Kolisi.

O loo galue tasi pea le nuu i le maumaga e tasi mai le pa 7 seia oo i le Atinae a le Ekalesia i gauta. E tusa ma le 12 000 le tiapula ma le talo o loo i ai i le taimi nei, ma o loo faia pea galuega faamama ma le veleina o le faatoaga. E i ai le faamoemoe e oo atu i le faaiuga o lenei tausaga, ua tele ma pala le talo i le maumaga o le Kolisi.

O lo o saogalemu ma malu le pa o loo siomia ai le maumaga mai mea tuaolō taaloa.



### PA POVI

O loo sologa manuia le atinae lafu manu papalagi i lenei kuata muamua o le tausaga faaleaoaoga. O le aofaiga o manu papalagi i ituaiga, e 3 povi pulu (bulls), 12 sikia (steer), 18 taanoa ma le 11 manu laititi. O le aofaiga atoa i le taimi nei e 44 povi, ma o loo tuufaasolo i pa e 7. Taitai: Rev Professor Vaitusi Nofoaiga; Sui Taitai: Faafetai Korua (Faiaoga MTC) Aoao: (T4) Spencer Leuta, Opetaiia Slam Samuelu ma Fred Laban; (T3) Sapati Sapati, Ben Tuia ma Junior Saolotoga; (T2) Sosopo Aiafi, Eseneiaso Fanolua ma Kulue Noa.



### FALEOLOA A LE KOLISI

Faatalofa atu i le paia o le Ekalesia ua mafai ona potopoto i Maluapapa mo le Fono Tele o lenei tausaga. O se ripoti pu'upu'u lenei mai le vaega o le faleoloa (canteen) a le Kolisi. O lenei auaunaga o loo faatinoina ma le faamoemoe e tali i manaoga o le Kolisi i aso taitasi, aemaise ai foi le tautuaina o le mamalu o loo autova'a mai i le Fono Tele i tausaga uma. O lenei galuega o loo nafa lava ma Susuga i A'oa'o, i lalo o le taitaiga a le Faiaoga. E tatala le faleoloa i aso uma o le vaiaso, i le taeao, aoauli faapea ma le afiafi ina ia mafai ona maua e tagata uma o loo fia manaomia lenei auaunaga. E tele lava oloa ese'ese o loo faapea ona maua ai, ma o loo faatauina atu foi i se tau talafeagai ma taugofie. O loo mafai foi ona talia aitalafu ma le faamoemoe e totogi i faaiuga o vaiaso taitasi. O tupe faasili e maua i le faleoloa o loo tu'uina atu i le Kolisi mo le fa'aleleia atili ai o le Kolisi. E momoli atu le fa'afetai tele i le Susuga i le Ali'i Pule, le Sui Pule, ma le Aiga Faiaoga ma o latou Faletua, fa'apea le mafutaga a A'oa'o ma Faletua, ona o lo latou lagolagoina o lenei auaunaga, faapea foi le agaga fa'afetai i le paia o le Ekalesia, i lo outou amanaiaina o lenei auaunaga a o usua ai le Fono Tele i lenei tausaga. Ma le agaga faaaloalo, ia manuia tele le Fono Tele o lenei tausaga. Faafetai. Vaega a le Canteen 2024.



### FA'AMAISEGA MO I LATOU UA MALILIU

Se mea a faigata o mafutaga ae momotu e le oti. Peitai, o la le aposetolo o Paulo, “o lo'u oti o lo'u manuia lea a'o lo'u ola ua ia Keriso lea.” I le amataga o lenei tausaga, na afea ai le Kolisi i le malaga a le maliu ma le oti i tuaā o nisi o le afaigaluega faapea nai a'oa'o ma faletua. Ia faamaise pea le agaga faamafanafana o le Atua i le Susuga i le faifeau faiaoga foma'i ia Reupena Maulolo ma le faletua, ona o le valaau a le Atua i le Tina peleina; o le tina foi o le Kolisi. E fa'amaise fo'i i le a'oa'o ia Talia Iati ma le faletua, ina ua tatala e le oti le mafutaga ma si tamā. Ia faamafanafanaina foi le Agaga o le Atua i le a'oa'o ia Lualua Manila ma le faletua ina ua faamanava e le Atua feau a le Tamā peleina. Faamafanafana fo'i le Atua i le a'oa'o ia Teturunga Toaba (A'oa'o Sikolasipi Kiribati) aua le valaau paia i le tinā o le aiga. E le i faigofie lava i a'oa'o ma faletua le motusia o mafutaga ma ē sa pelē a o iai i totonu o le Kolisi. A o la le aposetolo, “Ua ou tau le taua lelei, ua iu ia te a'u le tausinioga, ua ou taofi i le faatuatua.” (2 Timoteo 4:7). I le ma lea, ua fetalai Paulo, o le puapuaga e tupu ai le onosai, o le onosai e tupu ai le mautinoa, o le mautinoa e tupu ai le faamoemoe. Ia maua pea le mafanafana o le Atua.

OTHERS

FAAIPOIPOGA

E to'afa Susuga i A'oa'o o le Kolisi na faaiipoipo ia Tesema 2023, ma Ianuari 2024. O i latou uma nei o Susuga i Lagolago (tausaga 3) o le 2024. O Mareko Fasi Toma ua faaiipoipo atu ia Fotuivasa Tanuvasa; o Poao Laufiso ma Tioatamanino Luulau; Liaina Mauga ma Ranan Schuster; faapea Tapito Sanerivi ma Rehiw Matamua. Sa auai atu i ai le Kolisi ma togisao i ia aso fiafia faapitoa e ala i pese o sauniga lotu faapea foi faafiafiaga matagofie. Sa tali faaaloalo foi le Kolisi i mealofa ma faaaloaloga a aiga-na-lua mai ia faaiipoipoga uma. Ia manuia outou aiga fou i le agalelei o le Atua.



## AOAOGA A LE FANAU

### AOGA AMATA (KINDY)



E viia pea le alofa ma le agalelei o le Atua ina ua mafai ona faamaeaina foi aoaoga ma polokalame a le Maluapapa Aoga Amata i le kuata muamua o lenei tausaga. O le aso 19 o Fepuari 2024 na amatalia ai aoaoga a le fanau mo le Kuata muamua ae o le aso 30 Aperila na tuua ai aua lava vaituuaga masani a le aoga. O loo i le taitaiga a le Susuga i le Tama Pule, Rev Prof. Vaitusi Nofoaiga ma lona faletua ia Mile Nofoaiga faapea le lagolagosua a faletua o A'oa'o a le kulupu lava ia a le Aoga Amata. O le taimi amata i aso aoga e amata i le 8.30am i le 11:00am.

O le aofaiga o fanau aoga e 17, e to'a 10 tama ma le to'a 7 o teine faatasi ai ma le to'a 11 o faletua o A'oa'o o loo i totonu o lenei kulupu. O taiala uma lava mai le Matagaluega o Aoga, Taaloga ma Aganuu i le vaega o Aoga Amata o loo faapea ona mulimulita'ia lava mo le faatinoina o aoaoga a le fanau. O Faletua lava o lenei kulupu e gafa ma le faatinoina o lesona mo le fanau i aso taitasi ma o afiafi uma lava o Aso Sa e faatinoina ai le siakiina o lesona mo le vaiaso e faatautaia lava e le faletua o le Tama Pule ia Mile Nofoaiga ao lumanai ai le faatinoina i luma o le fanau aoga. Mo le kuata ua tuana'i na faatinoina ai mataupu e faatatau i Autu: Tagata/ Soifua Maloloina/ Alafapeti (Samoa ma le Faaperetania) ma Fuainumera 1 i le 20. O Aso Gafua i le Aso Tofi o aso ia e faia ai a latou mataupu ae o le Aso Faraile e tele ina faatinoina ai a latou taaloga ma le Zumba. O le polokalame lava ia mo aso taitasi e aofia ai le latou play time, Taimi o le lotu, fruit time, taimi o le lesona ma le latou story time e faatauaina ai lava le faitauina e faletua o Tusi mo le fanau aoga. Na i ai foi ē na asia le Aoga Amata i le na Kuata e pei o le asiagiaga masani lava a le vaega a le MESC (ECE) mo le siakiina pea o tulaga o loo faatinoina ai lesona ma aoaoga a le fanau, ma sa faamaeaina foi ma le manuia. Na oo atu foi le vaega a le Fuimu (FESA) mo le latou asiagiaga masani foi ina ia mafai ona faailoa i tamaiti tulaga ma gaoiga e fai pe a tulai mai se faalavelave faafuasei aemaise lava pe a mu se nofoaga poo totonu foi o aiga. Sa feagai foi le Aoga Amata ma lana polokalame masani mo le Eseta faapea foi le latou Field Trip sa faataunuuna lava i totonu o Malua lava. O le faamoemoe lava ina ia mafai e le fanau ona malamalama atili i lo latou siosiomaga. Ma le faaaloalo tele lava, Luafata Simanu Gasolo.



### AOGA ASO SA

E viia le alofa ma le agalelei o le Atua ua mafai ai ona tuta i nuu lelei galuega a le Aoga Aso Sa o lenei Kuata. E ia te a'u le ava ma le faaaloalo e faailoa atu ai se ripoti puupuu o le Aoga Aso Sa e tusa ai ma galuega faatino. O le Aoga Aso Sa e i lalo lava o le taitaiga a le Susuga i le Tama Pule ia Vaitusi Nofoaiga ma le Faletua ia Mile Nofoaiga. O faiaoga Aso Sa e aofia ai le Faletua o le Sui Pule ia Sina Wulf faatasi ai ma le lagolagosua a Susuga i Faletua o Faiaoga faapea susuga i Faaiuso ma Faletua. O le aofaiga atoa o tamaiti o le Aoga Aso Sa e 148. O faaiuso ma o latou Faletua e feagai ma mataupu o Aso Sa taitasi. E faatino aoga a Faiaoga Aso Sa i Aso To'onai taitasi e taitaia lava e le susuga i le Tama Pule ma le Faletua faatasi ai ma Faletua o Faiaoga. O le faamoemoe ina ia tapena lelei mataupu mo alo ma fanau i le Aso Sa.



E avea ai lenei avanoa e fai ai a'u ma sui o Susuga i Faaiuso ma Faletua e momoli ai le faafetai tele i le Susuga i le Tama Pule ma le Faletua, faapea foi Susuga i Faletua o Faiaoga ona o le faaso ma le fesoasoani na tuuina mai mo mataupu o Aso Sa taitasi. Faafetai i le tapenaina o i matou i lenei foi vaega taua o le galuega, faapea le ola aotauina i le Kolisi Faafaifeau a le Ekalesia.



GOLF



O le aso Faraile, 17 Me 2024, sa faatauunuina ai le taaloga tapolo faavāomalo i le malae i Faleata. O le taamilosaga leni e faia i tausaga taitasi i le taimi o le Fono Tele, i le va o au a Niu Sila, Ausetalia, ma le au a le Kolisi Faafaifeau i Malua (Kolisi). I le ma'ea ai o le lotu o le Au Leoleo i le taeao o lea aso, sa potopoto ai loa au e lua i Faleata. Na amata i le tatalo, ona soso'o ai lea ma le malū taeao, ona faagasolo ai lea o taaloga. Sa faia le taaloga i le tulaga fa'a "best ball" mo au ta'ito'alua.

E saga viia pea le alofa o le Atua ona o lona foaiina mai o se aso matagofie ma laofie e faatauunuina ai le tagapolo, ona o le tausaga na se'i mavae nei, sa loulouā le tau ma lē mafai ai ona faama'ea lelei le taaloga i lona atoaga. I le ma'ea ai o le taaloga leni tausaga, sa potopoto uma au e lua i le fale Samoa mo se taumafataga māmā, ma tōlaulauina ai le i'uga o le taaloga e pei ona tuuina atu e leni ripoti: **Autapolo Manukau:** Talia Tapaleao + STapaleao 76, PLeota + FMisiaita 74, EFuti + AMilo 71, IPatea + IRimoni 71, MLauvi + FMilo 71, NALO + LTanielu 89, FPerelini + TLava 87, FPama + FFA'alolo 79,

SNua + IEvile 79, ITanielu + TEvagelia 77, PLafolafo + Matualoto 73. **Autapolo Malua:** VNofoaiga + Tafatolu Tapaleao 73, AWulf + FSemaia 69, VSaga + HSasa 73, BKolia + LSetu 77, RSchuster + FFatulia 73, OPerelini + SMoleli 76, TSenara + APala'amo 85, CStowers + EEsera 71, AEtuale + TMataafa 75, IViki + MGaluvao 74, LNepo + TMaliko 72, NKofe + SMatai'a 69. **Best Gross:** 3<sup>rd</sup> Place IPatea + IRimoni 71 (countback); 2<sup>nd</sup> Place AWulf & FSemaia 69 (countback); 1<sup>st</sup> place NKofe + SMatai'a 69. **Nearest to the pin:** #2 CStowers, #6 ITanielu, #10 SMatai'a, #16 AEtuale. Longest drive: #3 HSasa, #8 FMilo, #11 SNua, #15 BKolia. **Overall Gross Best 10 scorecards:** Manukau 758, Malua 725, **CHAMPION 2024: MALUA.** I le aotelega o ai o le taaloga, ua faatumauina pea le ipu i le au a Malua mo leni tausaga. Faafetai i le alofa ma le agalelei o le Atua i le faatauunuina o lea faamoemoe taua o lo'o maua ai pea le fealofani ma le ta'aalo fiafia o le au uso Faifeau Toeaina, Faafeagaiga, faapea le Pule, Sui Pule ma Faiaoga Malua. E faafetaia foi le Susuga i le Faafeagaiga Sunita Nua mo le toniga a Malua, faapea le Vodafone Samoa mo pulou. E momoli atu le faamalo i Kapeteni o au e lua faapea sui o au taitasi auā le mafutaga matagofie ma le taaloga mataina o lea aso. Manuia le Fono Tele leni tausaga.



KOMITI O LE MALUAPAPA

Vaitusi Nofoaiga, Visesio Saga, Alesana Palaamo, Reupena Maulolo, Brian Kolia, Fatulia Fatulia, Clarke Stowers, Leuelu Setu, Esera Esera, Tafatolu Tapaleao, Hobert Sasa, Faafetai Korā. Makesi Namulauulu, Misioka Tanielu, Raisedinland Iose. Malua Theological College www.malua.edu.ws © 2024

